



Ioseph ne voulant consentir au lubrique desir de sa maistresse, est fausement accusé par elle, & constitué prisonnier.

IOSEPH ayant esté mené en Egypte, fut vendu pour esclaue à Putiphar, chef de la gendarmerie du Roy Pharaon, lequel (voyant que tout prosperoit és mains d'iceluy, & qu'il auoit l'esprit de Dieu) l'aima, & le constitua sur tous ses biens. Or parce que Ioseph estoit beau de visage, sa maistresse ietta ses yeux de concupiscence sur luy, & luy dit: Couche avec moy; mais luy ne voulant consentir à telle méchanceté, répondit: Tu sçais que mon maistre a telle fiance en moy de toutes choses, qu'il ne m'a rien reserué, sinon toy qui es sa femme; comment ferois-je ce mal si grand contre mon Seigneur? Elle, ce neantmoins, perseueroit de iour en iour en tels propos pour l'attirer à peché, à quoy Ioseph ne voulut consentir. Enfin vn iour le voyant seul en la maison, le prit par la robbe, & luy dit: Couche avec moy; mais luy, laissant sa robbe en la main d'elle, s'enfuit dehors. Adonc se voyant méprisée, pour courir sa folie, s'écria, & appella les hommes de sa maison, & leur dit, Que Ioseph s'estoit efforcé de coucher avec elle, mais que quand elle s'estoit écriée, il auoit laissé sa robbe qu'elle monstra. Et Putiphar trop legerement croyant sa femme, fut tant courroucé, qu'il mit Ioseph en la prison. Mais Dieu assista Ioseph, & luy donna grace, que le Geolier luy mist tous les autres prisonniers en sa charge.